



Hurriyat

Mustaqil gazeta

2024-yil
1-oktyabr
seshanba
№ 39 (1414)

Gazeta 1996-yil dekabrda chiqqan boshlagan * www.uzhurriyat.uz * @ gazhurriyat@mail.ru * t.me/hurriyatuz * Hurriyat gazetasi

ЎЗБЕКИСТОН ҲАҚИДА ҚИЗҚИЧА

Муҳтарам устоз ва мураббийлар!
Авалло, сиз, азизларни, юртимиздаги таълим-тарбия соҳаси ходимларини ўқитувчи ва мураббийлар кўни – умумхалқ байрами билан чин қалбимдан муборакбод этиб, барчангизга энг эзгу тилакларимни билдиришдан бахтиёрман.

Халқимиз ўзининг азму шижоати, бунёдкорлик салоҳияти билан Янги Ўзбекистон ва Учинчи Ренессанс пойдеворини барпо этаётган бугунги кунда ушбу улғу айёмнинг моҳияти, муаллим ва устозларнинг жамиятимиз ҳаётидаги ўрни ва аҳамияти айниқса ортиб бормоқда.

Эл-юртимиз азалдан эъзозлаб келадиган ўқитувчи ва мураббийларнинг мақоми, кадр-қиммати янада юксалтириш – биз амалга ошираётган давлат сиёсатининг энг муҳим, ҳал қилувчи йўналишига айлангани ҳам шундан далолат беради.

Зеро, донишмандлар айтганларидек, мамлакат аввало ердан ризқ-насиба ундирадиган деҳқонлар, халқни ёвдан, турли ёвузликлардан ҳимоя қиладиган аскарлар, ёш авлодга таълим ва тарбия берадиган фидойи муаллимларнинг саъй-ҳаракати билан обод ва фаровон бўлади.

Хурматли ватандошлар!
Кейинги йилларда миллий тараққиёт стратегиямиз асосида юртимизда таълим ва тарбия тизимида ҳам том маънода тарихий ишлар амалга оширилмоқда.

Қисқа фурсатда соҳага оид кўп қабил қонун, фармон ва қарорлар қабул қилиниб, бу борадаги ҳуқуқий база мустаҳкамланди. Янгиланган Конституция-мида ўқитувчининг мақоми алоҳида белгилаб қўйилди.

Республикамизда ҳар йили янги-янги таълим масканлари барпо этилиб, уларнинг моддий-техник базаси, кадрлар салоҳияти мустаҳкамланмоқда. Дарслик

ва ўқув қўлланмаларининг замон талабларига мос янги авлоди яратилмоқда.

Айниқса, мактабга таълим тизими дунёдаги илғор тажрибалар асосида мутлақо янгича ривожланиш босқичига қадам қўйди. Юртимиздаги болалар боғчалари сони 8 баробар ошди, салкам 38 мингтага, жумладан, нодавлат таълим муассасалари 250 тадан 29 мингтага, қамров эса 27 фоиздан 76,4 фоизга етгани ҳам бу фикрни тасдиқлайди.

Мамлакатимизда мактаб таълимини ривожлантириш умуммиллий ҳаракатга айланди. Бу ҳақда сўз юритганда, охириги етти йилда 5 мингдан зиёд мактабда, шу йилнинг ўзида эса 608 та мактабда қурилиш ва таъмирлаш ишлари бажарилганини таъкидлаш лозим.

Илк бор 530 та мактабда инклюзив таълим жорий этилди. Қорақалпоғистон Республикаси ва Хоразм вилоятида 288 минг нафардан ортиқ бошланғич синф ўқувчиларининг бепул овқатланиши йўлга қўйилди.

Хусусий сектор ривожини учун яратиб берилаётган қўлай имкониятлар натижасида нодавлат мактаблар улуши 5 фоизга етгани диққатга сазовордир.

Биз инсон кадрини улуғлашга қаратилган улкан ишларимиз доирасида ўқитувчи ва мураббийлар меҳнатини муносиб баҳолаш ва рағбатлантиришга алоҳида аҳамият бермоқдамиз.

Бугунги кунда ўқитувчиларнинг иш ҳақи 2016 йилга нисбатан ўртача 2,5 марта, профессор-ўқитувчиларнинг ойлик маоши эса 4,5 карра ўсгани, октябрь ойидан педагог ходимларнинг иш ҳақи яна 15 фоизга оширилиши шу борадаги саъй-ҳаракатларимиз натижасидир.

Таълим сифатини юксалтириш мақсадида педагогларнинг малакасини ошириш бўйича ягона ва вертикал тизим яратилди. Жорий йилда ҳозирга қадар 142 нафар ўқитувчи илғор хорижий давлатларда малака ошириб

қайтди. Мактаб директори лавозимига тайинлаш тизими такомиллаштирилиб, уларга менежерлик сертификатини бериш тартиби ўрнатилди.

Таълим-тарбия соҳасига берилаётган улкан эътибор туфайли ёшларимиз билим, фан ва техника, маданият ва санъат, спорт соҳаларида юксак марраларни қўлга киритаётгани барчамизни мамнун этмоқда.

Ўқувчиларимиз 2010-2016 йилларда халқаро фан олимпиадаларида 73 та медални қўлга киритган бўлса, сўнгги етти йилда 349 та, 2024 йилнинг ўзида эса 122 та медалга сазовор бўлгани ҳам биринчи навбатда сизларнинг машаққатли меҳнатингиз самарасидир.

Бу борада халқаро фан олимпиадаларида голибликни қўлга киритган ўқувчиларнинг устозларини рағбатлантириш тизими йўлга қўйилгани ва шу мақсадда Давлат бюджетидан 6 миллиард сўм маблағ йўналтирилгани муҳим рағбатлантирувчи омил бўлиб хизмат қилмоқда.

Ўзбекистон тарихида биринчи марта буюк алломаларимизга бағишланган халқаро фан олимпиадаларини ўтказишни бошладик. Бу эса фарзандларимиз, бутун халқимиз қалбида гурур ва ифтихор туйғуси билан бирга, дунёда Ўзбекистоннинг маърифий нуфузини ҳам юксалтирмоқда.

Мактабда иккинчи хорижий тил ва касб-хунарларни ўргатиш борасида ҳам муҳим қадамлар ташланди. Жорий ўқув йилида 354 та мактабда 16 мингдан зиёд ўқувчига иккита хорижий тилни ўқитиш, 289 та мактабда 40 мингдан ортиқ ўқувчига касб-хунар ўргатиш йўлга қўйилди.

Олий таълим соҳасида ҳам катта ислохотлар амалга оширилмоқда. Қисқа муддатда юртимизда 135 та янги олийгоҳ ташкил этилиб, уларнинг умумий сони 211 тага етказилгани, тизимда қамров даражаси 4 баробардан зиёд ошиб,

9 фоиздан 38 фоизга етгани мисолида буни яққол кўриш мумкин.

Қадрли дўстлар!
Кўҳна тарих, бугунги ҳаёт тажрибаси барча муаммоларнинг ечими, саволларнинг жавоби фақат ва фақат таълимда, камолот ва бахт эшикларининг калити таълим ва тарбияда эканидан далолат беради.

Барчамиз яхши тушунамизки, ўз олдимизга қўйган буюк мақсадларга етишда – жонажон Ўзбекистонимизни эркин ва фаровон, ҳар томонлама обод мамлакатга айлантиришда соҳа ривожини янги сифат босқичига кўтариш ҳал қилувчи аҳамият касб этади.

Сизлар билан бўлиб ўтган сермазун ва самимий мулоқотимизда бу ҳақда яна бир бор фикр алмашиб, келажак режаларимизни аниқ белгилаб олдик.

Ишончим комил, сиз, муҳтарам педагоглар, профессор-ўқитувчиларимиз таълим соҳасидаги ислохотларимизда янада фаол иштирок этиб, “Янги Ўзбекистон – маърифий жамият” деган олижаноб гоёмизни амалга оширишга муносиб ҳисса қўшасиз.


Ҳеч шубҳасиз, биз таълим ва тарбия тизимини янада раванқ топтириш, соҳа ходимлари учун муносиб меҳнат ва турмуш шароитларини яратиш масаласига бундан буён ҳам устувор аҳамият берамиз ва ўқитувчиларнинг жамиятимизда энг обрўли касблар қаторига олиб чиқамиз.

Муҳтарам устозлар!
Мана шу шуқуҳли айёмда сиз, азизларни яна бир бор чин дилдан қутлаб, барчангизга сийҳат-саломатлик, оилавий бахт, эзгу ва шарофли фаолиятингизда улкан муваффақиятлар тилайман.

Ҳамиша соғ-омон бўлинг, қадрли ва меҳрибон устозлар!

Шавкат МИРЗИЁЕВ,
Ўзбекистон Республикаси
Президенти

ЭЪЗОЗ



Абдулла ОРИПОВ,
Ўзбекистон Қаҳрамони,
Ўзбекистон халқ шоири.

МУАЛЛИМ

Муаллим ҳақида сўзим ушбундай:
Муаллим камолот ичра кўзгудир.
Ўқидим Геродот, тарихни кўп бор,
Форобий, Дантени такрор ва такрор.
Барини ўқидим, лол қолди ақлим,
Барига устозсан ўзинг, муаллим.
Алишер қалбига солган сеҳр-файз
Сенсан, эй муаллим, устоз Абул-Лайс.
Қутлуғ хонадонда қутлуғ калом бу,
Ҳамид Олимжон бу, Ғафур Ғулум бу.
Буюк Темур сендан топгандир таълим,
Сен шундоқ азиз зот, азиз муаллим.
Рост айтсам, ўзингсан энг аввал даҳо,
Сен ҳаёт ганжида дурри бебаҳо.
Улуғ айёмингда шеърий калом бу,
Шогирдлар номидан қутлуғ салом бу.

ЎЗБЕКИСТОНДА МИЛЛИЙ ЖУРНАЛИСТИКАНИНГ РИВОЖЛАНИШИ БЎЙИЧА ЎЗБЕКИСТОН ЖУРНАЛИСТЛАР УЮШМАСИНИНГ II МИЛЛИЙ МАЪРУЗАСИ

Азиз ҳамкасблар, хурматли журналистлар ва оммавий ахборот воситалари вакиллари! Эслаб ўтамиз, Президентимиз Шавкат Мирзиёевнинг 2022 йил 27 июндаги қарори билан тасдиқланган “2022-2023 йилларда оммавий ахборот воситаларини қўллаб-қувватлаш ҳамда журналистика соҳасини янада ривожлантириш чора-тадбирлари дастури”да ҳар йили Ўзбекистонда миллий журналистиканинг ривожланиши бўйича Ўзбекистон Журналистлар уюшмасининг миллий маърузасини тайёрлаш ва эълон қилиш белгиланган.

Ушбу ҳужжат ижроси доирасида 2023 йили Ўзбекистон Журналистлар уюшмасининг I миллий маърузаси эълон қилинди. Шу орқали мамлакатимиз миллий медиа соҳаси ривожини йўлида амалга оширилаётган ишларга яна бир бор назар ташлаш, соҳада амалга оширилган ишлар ҳақидаги маълумотлар билан тўлиқроқ танишиш, таҳлил қилиш, эришилган ютуқларни эътироф этиш имкониятлари яратилди. Шунингдек, журналистика соҳасида юзага келган муаммо ва камчиликлар ҳамда уларнинг ечими, Уюшма олдида турган долзарб масалалар, шунингдек, Ўзбекистонда миллий журналистикани ривожлантириш бўйича янги режа ва дастурлар бўйича оммага, шу жумладан, ОАВ вакилларига кенг ахборот тақдим этилди.

Таъкидлаш жоизки, эътиборингизга ҳавола этилаётган Уюшманинг мазкур II миллий маърузаси ҳам аини мақсад йўлида Ахборот ва оммавий коммуникациялар агентлиги, Ўзбекистон Миллий телерадиокомпанияси ҳамда Ўзбекистон Миллий медиа бирлашмаси билан ҳамкорликда, шунингдек, Ўзбекистон Журналистлар уюшмаси бошқаруви аъзолари ва ҳудудий бўлиmlари раҳбарлари, уюшма ҳузурида фаолият юритаётган ижодий кенгашлар масъуллари, соҳа экспертлари, бир сўз билан айтганда, кенг журналистлар жамоатчилиги тақлиф ва тавсиялари асосида, кўмаги билан тайёрланди.

ЎТКАЗИЛГАН АЙРИМ ТАДБИРЛАР ВА СОҲАГА ОИД ИСЛОҲОТЛАР САМАРАСИ

Барча соҳада бўлгани каби юртимизда миллий журналистикани ривожлантириш, очиқликни, матбуот ва сўз эркинлигини таъминлаш, медиа соҳа учун кадрлар тайёрлаш тизимини такомиллаштириш, бир сўз билан айтганда, Янги Ўзбекистоннинг янги журналистикасини яратиш бўйича кенг қўламли ишлар амалга оширилмоқда. Утган бир йил ичида ҳам соҳа ривожига қаратилган бир қатор ишлар бажарилиб, турли тадбирлар ўтказилди.

Жумладан, журналистика таълим йўналиши (бакалаврият, магистратура) бўйича дуал таълим шаклида журналистика соҳасида энг янги инновациялар, ҳолис, тезкор ва креатив нуқтаи назар, профессионал билим ва кўникмаларга эга кадрлар, етук мутахассислар тайёрлаш мақсадида Тошкентдаги Халқаро Нордик университети ва “UzReport” ахборот агентлиги ҳамкорлигида “UzReport” журналистика, медиа ва коммуникациялар академияси ташкил этилди. Ушбу академияга ўқишга қабул қилинган талабалар аини пайтда муҳир, суҳандон,



оператор, монтаж устаси, техник ходим, контент-менежер, овоз муҳандиси, SMM-ёрдамчи сингари замонавий медиа касбларни эгалламоқда. Мазкур таълим даргоҳининг фаолият бошлаши медиа соҳа учун кадрлар тайёрловчи олим таълим муассасалари ўртасида рақобатни кучайтиради.

Давлатимиз раҳбари Шавкат Мирзиёевнинг ташаббуси билан 2024 йил январь ойидан “Ўзбекистон адабиёти ва санъати” газетаси негизда “Jadid” газетаси нашр этилиши йўлга қўйилди. Мазкур нашр Ватан ва халқ манфаатлари йўлида жон фидо қилган жадид боболаримиз ҳаёти ва фаолиятини кенг тарғиб этишда ўзига хос тафаккур майдонини бўлиб хизмат қилмоқда.

4-6

ОБУНА — 2025



Ўзликни англаш,
матбуотни ўқиш —
“Hurriyat”дан
бошланади!
2025 йил учун обуна
бўлишни унутманг!

ОБУНА ИНДЕКСИ:
якка обуначилар ва ташкилотлар учун – 233

МУАММО ҲАҚИДА

ЖУРНАЛИСТЛАР МАСКАНИ ЁРДАМГА МУҲТОЖ

Маълумки, журналистика, оммавий ахборот воситалари ижтимоий ҳаётни акс эттириш, уни билиш, тадқиқ қилиш ва жамиятга қайтадан таъсир кўрсатишнинг муҳим воситасидир. Инсоният тарихи ва ривожини билан ҳамма ҳам муҳим бўлган бу ижтимоий соҳа тамаддунга эришган ҳар бир халқ ва жамиятнинг ҳаётида муҳим ўрин тутиб келмоқда. Инсоният оламида ва ривожланган ҳар қандай мамлакатда бирорта ижтимоий-сиёсий воқеа журналистиканинг, оммавий ахборот воситаларининг иштирокисиз бўлиб ўтмайди.

Бутун жаҳон олами юқори илмий ва техникавий тараққиётга эришиб, янада бир-бирига яқинлашиб, глобаллашиб бораётган ҳозирги даврда оммавий ахборот воситаларига бўлган талаб тобора

ошиб бормоқда. Газета ва журналлар, радио ва телевидение каби оммавий ахборот турлари ҳамда кейинги даврда вужудга келган интернет тармоқларидан иборат бўлган медиамакон жамият ҳаётида бениҳоя муҳим роль ўйнамоқда ва ҳар кун, ҳар соат, ҳар дақиқада турли хабарлар тарқатиб, инсонлар онгини тарбиялаш, унинг ижтимоий-сиёсий, маънавий эҳтиёжларини қондиришда катта роль ўйнаб келмоқда.

Мазкур муҳим ва зарур соҳа учун мутахассислар тайёрлашда илм-фаннинг йирик ўчоқлари бўлмиш университетлар асосий ўрин тутуши оддий ҳолдир, илло, бутун дунёда журналист кадрлар, асосан, университетларда ўқитилиб, тайёрланиб жамиятга етказиб берилмоқда.

3-6

